



# SLUŽBENE NOVINE

## KANTONA SARAJEVO

Godina XXI – Broj 25

Četvrtak, 23. juna 2016. godine  
SARAJEVO

ISSN 1512-7052

### KANTON SARAJEVO

#### Vlada Kantona Sarajevo

Na osnovu člana 4. st. (8) i (20), člana 50. Zakona o komunalnim djelatnostima ("Službene novine Kantona Sarajevo", broj 14/16) i čl. 26. i 28. stav (1) Zakona o Vladi Kantona Sarajevo ("Službene novine Kantona Sarajevo", broj 36/14 - Novi prečišćeni tekst i 37/14 - Ispravka), Vlada Kantona Sarajevo, na 45. sjednici održanoj 13.06.2016. godine, donijela je

#### UREDBU

#### O ORGANIZACIJI I NAČINU NAPLATE PARKIRANJA U KANTONU SARAJEVO

#### POGLAVLJE I - OSNOVNE ODREDBE

##### Član 1.

(Predmet Uredbe)

Ovom uredbom uređuju se:

- javne parking površine,
- organizacija i način naplate parkiranja,
- parking zone,
- vrste parking karata i način njihovog korištenja,
- uvjeti za sticanje i korištenje povlaštene parking karte,
- uplata i raspodjela prihoda od javnih parkinga,
- izgradnja novih parkinga i garaža,
- naplatu, nadzor i kontrolu nad parkiranjem vozila.

##### Član 2.

(Značenje pojmova)

Izrazi koji se koriste u ovoj uredbi imaju sljedeće značenje:

- davalac komunalne usluge - pravne ili fizičke osobe koje organizuje rad, obavlja naplatu i kontrolu nad parkiranjem vozila u skladu sa ovom uredbom,
- javna garaža - građevinski objekat namijenjen parkiranju vozila koji može biti izveden kao nadzemni ili podzemni ili kao nadzemno-podzemni objekat,
- javna parking površina - javna površina uređena kao ulični parking ili posebno izdvojeni parking ili garaža,
- javni parking- javna saobraćajna površina namijenjena isključivo za parkiranje putničkih motornih vozila,
- javni parking s naplatom (u daljem tekstu: parking sa naplatom) - uređena i propisno označena ulična ili izdvojena površina na kojoj je uvedena naplata parkiranja i koja je označena odgovarajućom saobraćajnom signalizacijom te informacijom o parking zoni, cijenama parkiranja ovisno o vremenu parkiranja kao i načinu plaćanja parkiranja,

- javni parking u privatnom vlasništvu - uređena i propisno označena izdvojena površina na parceli ili u objektu u vlasništvu pravnog ili fizičkog lica i koja je označena odgovarajućom saobraćajnom signalizacijom i opremom,
- kontrolor parkiranja - kvalifikovani zaposlenik pravne osobe sa javnim ovlaštenjem (u daljem tekstu: kontrolor).
- korisnik javnog parkinga (u dalnjem tekstu: korisnik) - vozač koji parkira vozilo na parking mjesto, odnosno druga osoba za koju je ovom uredbom određeno da se smatra korisnikom;
- Ministarstvo saobraćaja Kantona Sarajevo, (u daljem tekstu Ministarstvo) - prati stanje mirujućeg saobraćaja, provodi mjere poboljšanja i uspostavlja jedinstven sistem parkiranja,
- parking blok - dio parking zone unutar kojeg vrijede povlašteni uslovi parkiranja,
- parking mjesto - dio javne parking površine namijenjene parkiranju jednog vozila i označeno odgovarajućom saobraćajnom signalizacijom,
- parking zona - javna parking površina na kojoj je uvedena naplata,
- rezervisano parking mjesto - parking mjesto koje odobrava Ministarstvo, namijenjeno određenom korisniku i označeno odgovarajućom saobraćajnom signalizacijom,
- vozilo - osobni automobil i drugo motorno vozilo namijenjeno za prijevoz osoba, koji osim sjedišta za vozače ima najviše osam sjedišta i čija dopuštena masa ne prelazi 3500 kg i dimenzije odgovaraju propisanim dimenzijama parking mjesta osobnog automobila,
- ostala motorna vozila - teretna vozila preko 3500 kg, autobusi i minibusi,
- privremeni javni parkinzi su parkinzi koji se otvaraju zbog održavanja raznih skupova i manifestacija sportskog, kulturnog, političkog i dr. karaktera okupljanja,
- doplatni nalog - nalog i račun za plaćanje prekršaja ove uredbe.

##### Član 3.

(Sklopanje Ugovora)

- Ako ovom uredbom nije drugačije određeno, parkiranjem vozila na javnoj parking površini korisnik sklapa ugovor o korištenju javne parking površine, sa davaocem komunalne usluge, prihvatajući uvjete propisane ovom uredbom.
- Ugovorom iz stava (1) ovog člana isključuje se čuvanje vozila te odgovornost za nestanak, uništenje ili oštećenje vozila, osim ako ovom uredbom nije drugačije propisano.

Član 4.  
(Korisnik vozila)

- (1) Korisnikom se smatra vlasnik vozila koji je evidentiran u odgovarajućim evidencijama Ministarstva unutrašnjih poslova prema registarskim oznakama vozila, a za vozila koja nisu evidentirana vlasnik vozila utvrđuje se na drugi način.
- (2) Korisnikom se smatra i primalac leasinga kojem je vozilo prepušteno na korištenje na temelju pravnog posla leasinga, odnosno zakupac kojem je osoba koja obavlja registrovanu djelatnost rent-a-car usluge prepustila vozilo na korištenje na temelju ugovora o zakupu.

POGLAVLJE II - NADLEŽNOST, ORGANIZACIJA I  
NAČIN NAPLATE PARKIRANJA

Član 5.  
(Nadležnosti Ministarstva)

- (1) Ministarstvo utvrđuje jedinstven sistem javnog parkiranja na području Kantona Sarajevo.
- (2) U smislu stava (1) ovog člana Ministarstvo je nadležno za:
  - a) planiranje, organizaciju i unapređenje javnog parkiranja u Kantonu Sarajevo,
  - b) upravljanje javnim parkiranjem na području Kantona,
  - c) nadzor funkcionisanja javnih parkinga na području Kantona,
  - d) otvaranje novih parkinga,
  - e) uspostavljanje jedinstvenog sistema naplate parkiranja,
  - f) obnavljanje horizontalne signalizacije, te ugradnja i uklanjanje vertikalne signalizacije.
- (3) Ministarstvo je dužno osigurati svu parkirališnu opremu i izdvajati sredstva za održavanje.

Član 6.  
(Nadležnosti Općina)

- (1) Općine će u skladu sa ovom uredbom donijeti propis o uređenju, korištenju i naplati parkiranja kod objekata kolektivnog stanovanja, poslovnih prostora i objekata, na svom području.
- (2) Rok za izradu propisa iz stava (1) ovog člana je 90 dana od dana stupanja na snagu ove uredbe.

Član 7.  
(Nadležnosti davaoca komunalne usluge)

Nadležnosti davaoca komunalne usluge su:

- a) organiziranje procesa pružanja usluge: naplatu, nadzor i kontrolu naplate parkiranja,
- b) zimsko i ljetno održavanje parking površina,
- c) redovno čišćenje parking automata i opreme od snijega, leda, prašine.

Član 8.  
(Organizacija parkiranja)

Parkiranje vozila i naplata parkiranja organizira se na:

- a) javnim parkiranjima,
- b) javnim garažama,
- c) rezervisanim parking mjestima,
- d) javnim parkiranjima u privatnom vlasništvu.

**Odjeljak A - Parkiranje na javnim parkiranjima**

Član 9.  
(Vrste javnih parkinga)

- (1) Javni parkinzi mogu biti stalni ili privremeni, ulični ili izvanulični.
- (2) Stalni javni parkinzi su parkinzi na kojima se parkiranje naplaćuje tokom cijele kalendarske godine.
- (3) Privremeni javni parkinzi su parkinzi na kojima se parkiranje naplaćuje tokom privremene regulacije saobraćaja, organizacije prigodnih manifestacija, priredbi i slično.
- (4) Ulični javni parkinzi su parkinzi na ulici i trotoaru po odobrenju Ministarstva posebno označeni horizontalnom i vertikalnom saobraćajnom signalizacijom u skladu sa propisima o sigurnosti saobraćaja te tehničkom dokumentacijom.

- (5) Izvanulični javni parkinzi su parkinzi koji se nalaze izvan ceste, a označeni su vertikalnom i horizontalnom saobraćajnom signalizacijom u skladu s ovom uredbom i prostorno su definisani posebnim projektom.
- (6) Parking mjesto na asfaltiranim javnim parkiranjima označava se saobraćajnom signalizacijom koja je u skladu sa Zakonom o osnovama sigurnosti saobraćaja na putevima u Bosni i Hercegovini ("Službeni glasnik BiH", br. 6/06, 75/06, 44/07, 84/09, 48/10 i 18/13) i Pravilnikom o saobraćajnim znakovima i signalizaciji na cestama, načinu obilježavanja radova i prepreka na cesti i znakovima koji učesnicima u saobraćaju daje ovlaštena osoba ("Službeni glasnik BiH", broj 16/07 - u daljem tekstu: Pravilnik).
- (7) Javni parkinzi u smislu ove uredbe smatraju se i posebni prostori namijenjeni za parkiranje teretnih vozila i autobusa, čije lokacije su određene elaboratom izrađenim od nadležne institucije u saradnji sa jedinicama lokalne samouprave i uz saglasnost Ministarstva.
- (8) Javni parkinzi u smislu ove uredbe ne smatraju se posebni prostori za parkiranje putničkih motornih vozila koji pripadaju određenom objektu (poslovni ili stambeni objekat i dr.) kao i prostori određeni za parkiranje određene vrste vozila (taksi stajališta).
- (9) Javne parkinge utvrđuje Ministarstvo rješenjem.

Član 10.

(Obilježavanje javnog parkinga)

Javni parkinzi moraju imati oznaku parking zone i parking bloka, vrijeme naplate parkiranja i cijenu parking karte.

Član 11.

(Parking za osobe sa invaliditetom)

- (1) Na javnim parkiranjima sa naplatom na posebno obilježenim mjestima rezervisanim za parkiranje vozila osoba s invaliditetom, osobe s invaliditetom koje na vozilu imaju istaknut važeći međunarodni znak pristupačnosti, imaju pravo parkirati bez plaćanja naknade max. 2 h., nakon čega podliježu naknadama u skladu sa ovom uredbom.
- (2) Ukoliko osobe s invaliditetom vozilo sa međunarodnim znakom pristupačnosti parkiraju na parking mjestima sa naplatom dužni su platiti naknadu koja je predviđena ovom uredbom.
- (3) Broj i raspored obilježenih parking mjesta za osobe sa invaliditetom određuje Ministarstvo na osnovu izvještaja Ministarstva unutrašnjih poslova o broju izdatih znakova pristupačnosti.

Član 12.

(Zabrana)

- (1) Na javnim parkiranjima zabranjeno je:
  - a) parkiranje vozila koje nije registrovano ili nema registarskih oznaka,
  - b) ostavljanje neispravnog ili havariisanog vozila i zbog dotrajalosti neupotrebljivih vozila ili vozila koji nemaju svoj vlastiti pogon,
  - c) zauzimanje parking mjesta putem ograđivanja (rampe, ograde, i razni predmeti koji
  - d) fizički ometaju parkiranje),
  - e) neovlašteno zaustavljanje i parkiranje na rezervisanim parking mjestima,
  - f) zaustavljanje i parkiranje vozila uzastopno dva sata na parking mjestu bez valjane parking karte,
  - g) plakatiranje, crtanje i pisanje grafita na parkirališnoj opremi i saobraćajnoj signalizaciji na parkiranjima.

Član 13.

(Parkinzi uz kolektivne stambene objekte)

Izvanulični javni parkinzi uz kolektivne stambene objekte uredit će se posebnim propisima općina u skladu sa ovom uredbom.

## Odjeljak B - Parkiranje u javnim garažama

### Član 14.

(Javne garaže - garažiranje vozila)

- (1) Parkiranje i garažiranje u javnim garažama organizovano je i naplaćuje se tokom cijele kalendarske godine od strane davaoca komunalne usluge.
- (2) Dodjela garažnog parking mjesta se vrši na osnovu Ugovora na određeni i neodređeni vremenski period prema utvrdjenim cijenama iz Zaključka o cijenama parking karte.
- (3) Način naplate garažiranja i parkiranja, cijene parkirnih i garažnih parking karata i način njihovog korištenja u javnim garažama na prijedlog davaoca usluge usvaja Vlada Kantona Sarajevo, odnosno vlasnik u javnim garažama u privatnom vlasništvu.
- (4) Uslovi korištenja moraju biti vidljivo označeni na svakom ulazu i izlazu iz javne garaže.
- (5) Ministarstvo može ulaganjem namjenskih sredstava kao i u saradnji sa Gradom i Općinama graditi nove garaže što će se regulisati posebnim sporazumom.
- (6) Javne garaže koje su upisane u knjige vlasništva KJKP "RAD", te kojima upravlja i raspolaže KJKP "RAD" stavljaju se pod kontrolu i sistem rada Ministarstva.

### Član 15.

(Otvaranje novog parkinga)

- (1) Ministarstvo po službenoj dužnosti rješenjem utvrđuje javne parking prostore.
- (2) Lokacije za parkinge iz stava (1) ovog člana, Ministarstvo određuje po službenoj dužnosti te na prijedlog Općine odnosno Grada.
- (3) Nove lokacije za otvaranje parkinga za osobne automobile, teretna motorna vozila i autobuse utvrđuje Ministarstvo Planom.
- (4) Plan iz stava (3) ovog člana donosi se u skladu sa važećim prostorno-planskim dokumentima.
- (5) Izuzetno od odredbi stava (3) ovog člana, ukoliko prostorno-planski dokumenti nisu doneseni ili na istim nisu predviđene javne površine za parkiranje, Plan se donosi na osnovu stručnog mišljenja Zavoda za planiranje razvoja Kantona Sarajevo.

## Odjeljak C - Parkiranje na rezervisanim parking mjestima

### Član 16.

(Rezervisana parking mjesta)

- (1) Rezervisana parking mjesta odobrava rješenjem Ministarstvo po zahtjevu korisnika na određeni rok, najmanje šest mjeseci, a najviše do godinu dana uz odgovarajuću naknadu.
- (2) Iznimno, Ministarstvo će donijeti novo rješenje kojim će se korisniku osigurati drugo rezervisano parking mjesto u neposrednoj blizini, ako se prije isteka roka na koje je rješenje doneseno izmijene saobraćajne okolnosti.
- (3) Broj odobrenih rezervisanih parking mjesta u jednoj parking zoni može biti do 5% od ukupnog broja parking mjesta u toj parking zoni.
- (4) Iznimno broj odobrenih rezervisanih parking mjesta u pojedinom parking bloku može biti do 15% od ukupnog broja parking mjesta u tom parking bloku.
- (5) Odredbe st. (3) i (4) ovog člana ne odnose se na "0" parking zonu.
- (6) Procenat iz stava (3) ovog člana je sadržan u stavu (4) istog člana.

### Član 17.

(Dodjeljivanje rezervisanih parking mjesta)

- (1) Rezervisano parking mjesto može se odobriti državnim institucijama, sudskoj vlasti, institucijama kantonalne vlasti, institucijama jedinica lokalne samouprave i institucijama koje su oslobođene plaćanja po drugim propisima, po jedno parking mjesto bez naknade.

- (2) Rezervisano parking mjesto može se odobriti pravnim i fizičkim osobama uz propisanu novčanu naknadu.
- (3) Ambasadama i konzulatima mogu se bez plaćanja naknade odobriti dva rezervisana parking mjesta ili na bazi reciprociteta na osnovu informacije Ministarstva vanjskih poslova Bosne i Hercegovine, dok se ostala parking mjesta mogu rezervisati uz propisanu novčanu naknadu.
- (4) Rezervisano parking mjesto obilježava se odgovarajućom signalizacijom i opremom od strane Ministarstva nakon uplate korisnika na žiro račun iz člana 17. stav (2) ove uredbe.
- (5) Ustupanje na korištenje određenih parking mjesta bez novčane naknade za potrebe održavanja kulturnih, sportskih, političkih i drugih manifestacija odobrava Ministar.
- (6) Iznimno od stava (5) ovog člana Ministarstvo može ustupiti određeni broj parking mjesta uz novčanu naknadu prema cijenama predviđenim Zaključkom o cijenama parking karte.

## Odjeljak D - Parkiranje na javnim parkinzima u privatnom vlasništvu

### Član 18.

(Privatni parkinzi i garaže)

- (1) Privatni parking je uređena, asfaltirana i propisno označena izdvojena površina na parceli ili u objektu u vlasništvu pravnog lica ili fizičkog lica.
- (2) Javna garaža u privatnom vlasništvu je objekt u kojem se na organiziran način parkiraju vozila, uz mogućnost plaćanja naknade za parkiranje.
- (3) Parking i garaža iz st. (1) i (2) ovog člana, mogu se otvoriti u okviru objekta ili na zemljištu u privatnom vlasništvu za koje Ministarstvo izdaje saobraćajnu saglasnost u skladu sa odredbama Zakona o prostornom uređenju Kantona Sarajevo ("Službene novine Kantona Sarajevo", broj 7/05).
- (4) Vlasnici privatnih parkinga i garaža dužni su plaćati naknadu za čisti prijevoz u iznosu od 5% od utvrđene cijene parkiranja.
- (5) Oračun naknade iz stava (4) ovog člana vršit će Ministarstvo na osnovu pismenog izvještaja o sredstvima prikupljenih naplatom za korištenje parkinga.
- (6) Naknadu iz st. (4) i (5) ovog člana potrebno je uplatiti na žiro račun Kantona Sarajevo svakog 25. u mjesecu za prethodni mjesec.
- (7) Parking iz stava (1) ovog člana mora biti označen odgovarajućom vertikalnom i horizontalnom signalizacijom, u skladu sa Zakonom i Pravilnikom.

## POGLAVLJE III - PARKING ZONE

### Član 19.

(Zone javnih parkinga)

- (1) Javni parkinzi svrstavaju se u tri parking zone.
- (2) Zone su obilježene slijedećim bojama:
  - a) "O" zona je zelene boje;
  - b) "I" zona je crvene boje;
  - c) "II" zona je žute boje.
- (3) "I" zona i "II" zona mogu se dijeliti na parking blokove.
- (4) Područja parking zona usvaja Vlada Kantona Sarajevo (u daljem tekstu: Vlada) na prijedlog Ministarstva.
- (5) Radi zaštite historijske ili kulturne baštine Kantona Sarajeva, promoviranja turizma ili iz drugih razloga koji su važni za Kanton Sarajevo, Ministarstvo može zabraniti ili vremenski ograničiti parkiranje u pojedinim parking zonama i parking blokovima, osim za osobe koje imaju prebivalište ili boravište, odnosno sjedište ili koriste poslovni prostor u tim područjima.

### Član 20.

(Radno vrijeme javnih parkinga)

- (1) Radno vrijeme javnih parkinga po zonama:
  - a) u "0" zoni u vremenu od 00-24 sata, od Pon-Ned, (zadržavanje max. 2 sata);
  - b) u "I" zoni u vremenu od 00-24 sata, od Pon-Ned;
  - c) u "II" zoni u vremenu od 00-24 sati, od Pon-Ned.
- (2) Parkinzi u "0", "I" i "II" zoni rade i praznicima.

POGLAVLJE IV - VRSTE PARKING KARATA I NAČIN  
NJIHOVOG KORIŠTENJAČlan 21.  
(Parking karte)

- (1) Za korištenje javnog parkinga i javnih garaža korisnik mora imati važeću parking kartu.
- (2) Parking karta iz stava (1) ovog člana je karta koja je plaćena za:
  - a) parking zonu, parking blok ili javnu garažu u kojoj se koristi usluga parkiranja.
  - b) vrijeme korištenja parkiranja, odnosno za razdoblje na koje je sklopljen ugovor o korištenju javne parking površine,
  - c) vozilo prema registarskim oznakama i ulici za koju je kupljena koji su ispisani na karti, kada se karta kupuje za određeno vozilo.

Član 22.  
(Oblik parking karte)

- (1) Parking karta se izdaje na papiru, u obliku naljepnice ili drugom odgovarajućem obliku.
- (2) Parking karta se može izdati i kao potvrda u elektronskom obliku.
- (3) Parking kartu može izdati pružalac komunalne usluge samo u slučaju kvara automatske naplate o čemu je dužan obavijestiti Ministarstvo.
- (4) Štampanje i izrada svih vrsta parking karata bit će u nadležnosti Ministarstva, a rok za preuzimanje svih poslova štampe bit će 90 dana od dana stupanja na snagu ove uredbe.

## Član 23.

## (Vrste parking karte, prodaja i distribucija)

- (1) Parking karta za parkiranje na javnom parkingu izdaje se kao dnevna karta za određenu parking zonu i vrijedi od trenutka izdavanja do istog vremena u prvom sljedećem danu u kojem se naplaćuje parkiranje.
- (2) Za sklapanje ugovora o korištenju jednog parking mjesta na javnom parkingu u trajanju kraćem od 24 sata izdaje se jednosatna ili višesatna parking karta (u daljem tekstu: satna karta).
- (3) Za sklapanje ugovora o korištenju jednog parking mjesta na javnom parkingu u trajanju dužem od 24 sata izdaje se sedmična, mjesečna ili godišnja parking karta.
- (4) Izgled, sadržaj, prodaja i distribucija parking karata za parkiranje na javnim parkinzima određuje se posebnim članom.

Član 24.  
(Izgled parking karte)

- (1) Satna parkima karta treba da sadrži: broj parkomata, naziv ulice, datum i vrijeme uplate, vrijeme važenja i druge tehničke elemente u svrhu unapređenja sistema.
- (2) Povlaštena parking karta treba da sadrži: grb Kantona Sarajevo, puni naziv Ministarstva, grb i naziv davaoca komunalne usluge, serijski broj, boju prema zoni parkiranja, godinu i mjesec na koji se odnosi, hologramsku zaštitu, suhi žig Ministarstva, čip i druge elemente u svrhu unapređenja sistema.
- (3) Godišnja parking karta treba da sadrži: grb Kantona Sarajevo, puni naziv Ministarstva, serijski broj, određenu boju, godinu na koji se odnosi, hologramsku zaštitu, suhi žig Ministarstva i druge elemente u svrhu unapređenja sistema.

## Član 25.

## (Način isticanja parking karte)

- (1) Kupovinom i isticanjem parking karte na vidno mjesto prednjeg vjetrobranskog stakla vozač, odnosno vlasnik vozila zaključuje sa davaocem komunalne usluge ugovor o korištenju parkinga prihvatajući opće uslove propisane ovom uredbom.
- (2) Korisnik javnog parkinga dužan je valjanu parking kartu u roku od 10 minuta od parkiranja vozila propisno istaknuti na vozilo tako da davalac komunalne usluge može provjeriti njenu važnost.

- (3) Ako korisnik javnog parkinga ne istakne valjanu parking kartu iz stava (2) ovog člana ili je istakne tako da se ne može provjeriti njena valjanost, smatrat će se da nema valjane karte.
- (4) Parking karta je isprava kojom korisnik parkinga dokazuje da je platio odgovarajuću naknadu prema zoni parkiranja, te da se na parkingu zadržava u okviru dopuštenog vremena.
- (5) Ugovorom iz stava (1) ovog člana isključuje se čuvanje, odgovornost za oštećenje, provalu ili krađu vozila, na uličnim i posebnim parkinzima određenim od strane Ministarstva uz posebnu naknadu.

## Član 26.

## (Povreda ugovora o korištenju parkinga)

- Korisnik parkinga čini povredu ugovora o korištenju parkinga, koja povlači kaznu u vidu doplatnog naloga, i to ako:
- a) ne istakne parking kartu na vjetrobranskom staklu vozila nakon parkiranja u roku od 10 minuta u skladu sa članom 25. stav 2. ove uredbe;
  - b) koristi parking kartu koja ne odgovara zoni parkiranja;
  - c) prekorači dopušteno vrijeme parkiranja;
  - d) ako korisnik parkiranja koristi povlaštenu parking kartu koja nije u skladu sa ovom uredbom;
  - e) ako svojim položajem parkiranja zauzima više parking mjesta;
  - f) ako korisnik parkiranja učini bilo koju navedenu radnju parkiranja iz ovog člana i stava (1), al. a), b), c), d) i e) ove uredbe može biti sankcionisan blokiranjem vozila postavljanjem naprave za blokiranje točkova - plaćanjem doplatnog naloga ili odnošenjem specijalnim vozilom pauk.

## Član 27.

## (Vrste sankcija)

- (1) Sankcija blokiranja vozila postavljanjem naprave za blokiranje točkova i plaćanja doplatnog naloga će se primjenivati za slučajeve iz člana 26. alineja a), b), c), d) ove uredbe.
- (2) Sankciju odnošenja specijalnim vozilom pauk će primjenjivati za slučajeve iz člana 12. stav (1) al. a), b), d), i e) i iz člana 26. alineja e) ove uredbe.
- (3) Doplatni nalog će se izdavati za slučajeve iz člana 11. stav (1), ukoliko se postupi suprotno odredaba stava (2).

## Član 28.

## (Rok za plaćanje doplatnog naloga)

Doplatni nalog za uklanjanje specijalne naprave za blokiranje točkova potrebno je uplatiti do 20 h (radno vrijeme Pošte) istog dana kada je i postavljena, ukoliko to ne bude učinjeno vozilo će biti premješteno specijalnim vozilom pauk.

## Član 29.

## (Kupovina parking karte)

- (1) Korisnik javnog parkirališta može kupiti satnu kartu na slijedeći način:
  - a) na parking automatu uz odgovarajuću novčanu naknadu (kovanice u domaćoj valuti);
  - b) mobilnim telefonom, sms porukom ukucavanjem registarske oznake vozila i slanjem poruke na broj označen na svakom parking automatu;
  - c) pretplatničkom karticom kupljenom na ovlaštenim prodajnim mjestima, te ubacivanjem na predviđenim mjestima na parking automatima.
- (2) Naplata satne karte na parking automatu podrazumijeva istovremeno plaćanje i preuzimanje parking karte neposredno na javnom parkingu na kojem se nalazi parking automat.
- (3) Naplata satne karte mobilnim telefonom podrazumijeva elektronsku kupovinu parking karte o čemu korisnik parkiranja prima poruku o plaćenju parking karti mobilnim telefonom.
- (4) Naplata satne karte putem pretplatničke kartice kupljene na ovlaštenim prodajnim mjestima podrazumijeva istovremeno plaćanje i preuzimanje parking karte na parking automatu.



- (5) Izuzetno od stava (1) ovog člana na privremenim javnim parkinzima korisnik parkinga može kupiti satnu kartu od davaoca komunalne usluge.

Član 30.

(Garažna parking karta)

- (1) Garažna parking karta izdaje se za određenu javnu garažu, i to kao: satna, višesatna, cjelodnevna, sedmična, mjesečna ili godišnja karta ili Ugovorom definisano iz člana 14. stav (2).
- (2) Satne i višesatne karte mogu se izdati kao dnevne ili noćne.
- (3) Izgled i sadržaj garažnih parking karata za garaže koje su u privatnom vlasništvu određuje vlasnik garaže.
- (4) Izgled i sadržaj garažnih parking karata za garaže koje su upisane u knjige vlasništva KJKP "RAD", te kojima upravlja i raspolaze KJKP "RAD" određuje Ministarstvo.

POGLAVLJE V - POVLAŠTENI PARKING KARTA

Član 31.

(Povlašteni parking karta)

- (1) Fizička osoba (stanar) koja ima prebivalište u određenoj ulici ili boravište na području na kojem se naplaćuje parkiranje, pravna osoba, fizička osoba odnosno osoba koja obavlja drugu samostalnu djelatnost koja ima sjedište ili koristi poslovni prostor unutar parking zone u kojoj se naplaćuje parkiranje može koristiti povlašteni uvjete parkiranja u pogledu cijene i korištenja javnih parkinga (povlašteni parking karta).
- (2) Povlašteni parking karta izdaje se i vrijedi za parking blok unutar parking zone, odnosno za zonu koja nije podijeljena na parking blokove, u kojoj osoba koja ostvaruje pravo na povlaštenu parking kartu ima prebivalište ili boravište, vlasništvo nekretnine odnosno sjedište ili koristi poslovni prostor na tom području.
- (3) Povlašteni parking karta vrijedi za period za koji je izdata (mjesec) i u periodu od 17 do 07 sati.
- (4) Odredbe ovog člana odnose se na ulične javne parkinge kojim upravlja Ministarstvo.

Član 32.

(Pravo na povlaštenu parking kartu)

- (1) Pravo na povlaštenu parking kartu ima:
  - a) fizička osoba (stanar) ukoliko ima prebivalište ili boravište na području na kojem se naplaćuje parkiranje, što dokazuje cipsom prijavom prebivališta ili potvrdom Ministarstva unutrašnjih poslova, kao i da ima vozilo u vlasništvu ili leasingu, što dokazuje važećom vlasničkom knjižicom,
  - b) pravna osoba, fizička osoba odnosno osoba koja obavlja drugu samostalnu djelatnost ako ima sjedište ili koristi poslovni prostor na području na kojem se naplaćuje parkiranje, što dokazuje ugovorom o zakupu ili vlasništvu poslovnog prostora, odnosno izvatom iz registra koji vodi nadležno tijelo iz kojeg je vidljiva poslovna adresa na kojoj se obavlja djelatnost i ima vozilo u vlasništvu ili leasingu, što dokazuje važećom saobraćajnom dozvolom.
- (2) Pravo na povlaštenu parking kartu ima vlasnik stana ili kuće ako:
  - a) ako je nekretnina na području na kojem se naplaćuje parkiranje što dokazuje dokumentacijom o vlasništvu nekretnine,
  - b) ima prijavljeno prebivalište ili boravište na području Kantona Sarajeva, što dokazuje cipsom prijavom prebivališta ili potvrdom Ministarstva unutrašnjih poslova i ima u vlasništvu ili leasingu vozilo, što dokazuje važećom potvrdom o registraciji i vlasničkom knjižicom.

Član 33.

(Isticanje povlaštene parking karte)

- (1) Osoba koja ima pravo na povlaštenu parking kartu obavezna je istu istaknuti (zalijepiti) na vidno mjesto prednjeg vjetrobranskog stakla.

- (2) Ukoliko korisnik ne istakne (ne zalijepi) povlaštenu parking kartu na vidno mjesto prednjeg vjetrobranskog stakla podliježe sankcijama propisanim ovom uredbom.

Član 34.

(Posebni slučajevi dodjele povlaštene parking karte)

- (1) U opravdanim slučajevima povlaštenu parking karta može se izdati na zahtjev humanitarnog udruženja, zdravstvene ustanove, fizičke osobe koje imaju teško bolesnog člana obitelji.
- (2) O opravdanosti zahtjeva iz stava (1) ovog člana odlučuje Ministarstvo.
- (3) U izuzetnim i hitnim slučajevima Ministarstvo može izdati povlaštenu parking kartu.

Član 35.

(Besplatne godišnje parking karte)

- (1) Ministarstvo može izdati besplatnu godišnju parking kartu institucijama i osobama.
- (2) Vozila iz stava (1) ovog člana mogu se parkirati na svim uličnim parkinzima kojim upravlja Ministarstvo, osim na posebnim parkiralištima (parkirališta sa rampama).

Član 36.

(Zamjena korištenja povlaštene parking karte)

- Ukoliko korisnik povlaštene parking karte za vrijeme njenog važenja promijeni vozilo za koje je karta izdata, Ministarstvo na zahtjev korisnika, izdat će novu povlaštenu parking kartu sa rokom važenja prethodno izdate povlaštene parking karte.

POGLAVLJE VI - CIJENA PARKIRANJA, UPLATA I KORIŠTENJE SREDSTAVA OD JAVNIH SREDSTAVA PRIKUPLJENIH OD PARKIRANJA VOZILA

Član 37.

(Cijena parkiranja)

- (1) Cijenu parking karte za pojedine parking zone, cijenu sankcija (pauk i naprava za blokiranje točkova), određuje Vlada na prijedlog Ministarstva.
- (2) Cijena parkiranja na javnim parking prostorima se sastoji iz:
  - a) cijene komunalne usluge održavanja javnog parking prostora,
  - b) naknade za unapređenje i investiciono održavanje parkirališta,
  - c) naknade za čisti prijevoz.
- (3) Cijena održavanja javnih parking prostora od strane davaoca komunalne usluge će se utvrditi u skladu sa Zakonom o komunalnim djelatnostima.
- (4) Pod održavanjem javnih parkirališta smatra se rad kontrolora, čišćenje površine za parkiranje i zimsko održavanje od snijega i leda.
- (5) Cijenu naknade za unapređenje i investiciono održavanje parkirališta i naknade za čisti prijevoz utvrđuje Vlada na prijedlog Ministarstva.
- (6) Naknada za unapređenje i investiciono održavanje javnih parkirališta se koristi za unapređenje i investiciono održavanje infrastrukture komunalne djelatnosti na području Općine gdje se nalazi parkiralište u minimalnom iznosu od 70%.
- (7) Korištenje naknade iz tačke (5) ovog člana regulisaće se posebnim sporazumom sa svakom općinom posebno.
- (8) Naknada za čisti prijevoz je naknada kojom se stimuliše korištenje parkirališta izvan užeg centra grada i čistih vidova prijevoza, a destimuliše parkiranje u užem centru grada ("0" i "T" zona).
- (9) Visinu naknade za rezervisano parking mjesto i povlaštenu parking kartu utvrđuje Ministarstvo.
- (10) Odredbe stava (1) ovog člana ne odnose se na javne parkinge i garaže u privatnom vlasništvu.

## Član 38.

(Poseban račun javnih usluga)

Ministarstvo finansija Kantona Sarajevo će u skladu sa zakonskim propisima, a iz oblasti finansija donijeti Uputstvo, a na zahtjev Ministarstva o: načinu uplate, evidentiranja i raspolaganja sredstvima prikupljenim od parkiranja vozila na javnim parkiralistima.

## Član 39.

(Korištenje sredstava od naplate javnih parkinga)

Sredstva od naplate javnih parkinga će se koristiti za:

- plaćanje cijene komunalne usluge za održavanje javnog parking prostora,
- unapređenje postojećih javnih parkinga i garaža, te otvaranje novih,
- unapređenje parkirališta izvan užeg centra grada i čistih vidova prevoza,
- kupovinu opreme za unapređenje parkirališta i garaža.

## POGLAVLJE VII - IZGRADNJA NOVIH PARKINGA

## Član 40.

(Parkinzi u sklopu privatnih objekata)

Vlasnici kolektivnih stambenih objekata, velikih trgovačkih centara i drugih sličnih objekata dužni su osigurati svojim korisnicima korištenje parkiranja na parking u izgrađeno u okviru tih objekata, u skladu za propisanom zakonskom legislativom.

## POGLAVLJE VIII - KONTROLA PARKIRANJA NA JAVNIM PARKINZIMA

## Član 41.

(Kontrola na javnim parkinzima)

- Kontrolu nad parkiranjem vozila na javnim parking površinama obavlja kontrolor kojeg ovlasti davalac komunalne usluge - kontrolor.
- Kontrolori imaju službenu legitimaciju, nose službena odijela i koriste se odgovarajućom tehničkom opremom koja omogućuje evidentiranje: mjesta, vremena parkiranja i registarskih oznaka vozila.
- Kontrolor naplate parkiranja za vozilo zatečeno bez valjane parking karte ostavlja obavijest u printanoj ili ručno pisanoj formi da će vlasniku zatečenog vozila biti izdan doplatni nalog u skladu sa općim uvjetima ugovora o korištenju parkinga propisanim ovom Uredbom i Zakonom o prekršajima Federacije Bosne i Hercegovine.
- Doplatni nalog za plaćanje novčane kazne izdaje ovlaštena službena osoba davaoca komunalne usluge i dostavlja ga putem pošte na kućnu adresu.
- Izgled legitimacije i izgled službenih odijela kontrolora parkiranja definirat će se ugovorom sa davaocem komunalne usluge.
- Ministarstvo će putem vlastitih ovlaštenih osoba vršiti nadzor nad radom kontrolora.
- Ukoliko se utvrdi da kontrolor ne obavlja kontrolu naplate parkiranja u skladu sa ovom uredbom. Ministarstvo će pokrenuti disciplinski postupak.

## Član 42.

(Nadzor i kontrola nad provođenjem Uredbe)

- Upravni nadzor nad provođenjem odredbi ove uredbe i nadzor nad načinom rada davaoca komunalne usluge parkiranja vrši Ministarstvo.
- Poslove inspekcijskog nadzora nad primjenom ove Uredbe obavljat će Kantonalna saobraćajna inspekcija i komunalna inspekcija nadležnih Općina.

## Član 43.

(Sporazum sa davaocem usluge)

Ministarstvo će posebnim sporazumom definisati odnose sa davaocem komunalne usluge i odrediti raspodjelu prikupljenih sredstava od parkiranja.

## POGLAVLJE IX - KAZNENE ODREDBE

## Član 44.

- Novčanom kaznom u iznosu od 40,00 KM kaznit će se za prekršaj vozač koji je vozilo parkirao na posebno označenom parking mjestu za invalidne osobe bez međunarodnog znaka pristupačnosti.
- Novčanom kaznom u iznosu od 30,00 KM u vidu doplatnog naloga kaznit će se za prekršaj vozač koji je vozilo parkirao na javnom parking u skladu sa članom 26. stav (1) al. a), b), c) i d) ove uredbe.
- Novčanom kaznom u iznosu od 30,00 KM u vidu doplatnog naloga kaznit će se za prekršaj vozač koji je vozilo sa međunarodnim znakom pristupačnosti parkirao na javnom parking duže od dozvoljenog vremena u skladu sa članom 11. stav (1) ove uredbe i ukoliko vozilo sa međunarodnim znakom pristupačnosti parkira na javnom parking u skladu sa valjane parking karte u skladu sa članom 11. stav (2) ove uredbe.
- Novčanom kaznom u iznosu od 30,00 KM u vidu doplatnog naloga kaznit će se za prekršaj vozač koji nije vidno istakao (zaljepio) povlaštenu parking kartu na vjetrobranskom staklu u skladu sa članom 33. stav (2) ove uredbe, ukoliko vozač koristi povlaštenu parking kartu koja ne odgovara zoni parkiranja u skladu sa članom 26. stav (1) alineja b) ove uredbe, ukoliko vozač koristi povlaštenu parking kartu koja nije u skladu sa članom 26. stav (1) alineja d) ove uredbe, ukoliko vozač svojim položajem parkiranja zauzima više parking mjesta u skladu sa članom 26. stav (1) alineja e) ove uredbe.
- Za prekršaje iz člana 12. stav (1) al. a), b), d), i e) ove uredbe vozilo će biti premješteno specijalnim vozilom paukom, u skladu sa zakonskom regulativom.
- Za prekršaje iz člana 12. stav (1) alineja šest ove uredbe kaznit će se počinitelj u skladu za Zakonom o komunalnoj čistoći.

## POGLAVLJE X - PRIJELAZNE I ZAVRŠNE ODREDBE

## Član 45.

(Započeti postupci)

Svi postupci odobravanja javnih parkinga i rezervisanja parking mjesta koji su započeti prije donošenja ove uredbe okončaće se prema propisima po kojima su započeti.

## Član 46.

(Upravni spor)

- Protiv upravnih akata Ministarstva ne može se izjaviti žalba, ali se može pokrenuti upravni spor.
- Upravni spor se pokreće kod kantonalnog suda u Sarajevu u roku od 30 dana od dana prijema upravnog akta.

## Član 47.

(Gramatička terminologija)

Gramatička terminologija korištenja muškog ili ženskog spola podrazumijeva uključivanje oba spola.

## Član 48.

(Prestanak važenja propisa)

Danom stupanja na snagu ove Uredbe prestaje primjena: Uredbe o organizaciji i načinu naplate parkiranja ("Službene novine Kantona Sarajevo", br. 18/97), članova Odluke o sigurnosti i organizaciji prometa ("Službene novine Kantona Sarajevo", br. 14/97) koji regulišu zaustavljanje i parkiranje vozila (čl. 11-23), Zaključak o zonama javnih parkirališta ("Službene novine Kantona Sarajevo", br. 12/00, 16/11 i 51/13).

## Član 49.

(Stupanje na snagu)

Ova Uredba stupa na snagu osmog dana od dana objavljivanja u "Službenim novinama Kantona Sarajevo".

Broj 02-05-20147-3/16  
13. juna 2016. godine  
Sarajevo

Premijer  
**Elmedin Konaković, s. r.**